

Ўзбекистонда sog'liqni saqlash Здравоохранение Узбекистана



Газета 1995 йил октябрь ойидан чиқа бошлаган • @uzssgzt, uzss@yandex.ru • 2022 йил 7 июнь • №26 (1410)

Ўзбекистон Республикаси Президентининг
ФАРМОНИ

ҚОРАҚАЛПОҒИСТОН РЕСПУБЛИКАСИ ХУДУДИДА ФАВҚУЛОДДА ҲОЛАТ ЖОРИЙ ЭТИШ ТЎҒРИСИДА

Ўзбекистон Республикаси Конституциясининг 93-моддаси 19-банди ҳамда Ўзбекистон Республикасининг “Фавқулодда ҳолат тўғрисида”ги Конституциявий қонунининг 5-7-моддаларига мувофиқ:

1. Фуқароларнинг хавфсизлигини таъминлаш, уларнинг ҳуқуқ ва эркинликларини ҳимоя қилиш, қонунийлик ва ҳуқуқ-тартиботни тиклаш мақсадида Қорақалпоғистон Республикаси ҳудудида 2022 йил 3 июль куни соат 00:01 дан **2022 йил 2 август куни соат 00:00 га** қадар бўлган даврда фавқулодда ҳолат жорий этилсин.

2. Қорақалпоғистон Республикаси ҳудудида фавқулодда ҳолат амал қилиши даврида **соат 21:00 дан соат 07:00 га** қадар **комендантлик соати** жорий этилсин.

3. Фавқулодда ҳолат амал қилиши даврида **Қорақалпоғистон Республикаси ҳудудининг комендатураси** ташкил этилсин ва унга Ўзбекистон Республикасининг “Фавқулодда ҳолат тўғрисида”ги Конституциявий қонунида назарда тутилган барча ваколатлар берилсин.

Ўзбекистон Республикаси Миллий гвардиясининг қўмондони **Рустам Мирзаевич Джураев** Қорақалпоғистон Республикаси ҳудудининг коменданти этиб тайинлансин.

4. Фавқулодда ҳолат амал қилиши даврида қуйидаги чоралар ва **вақтинчалик чекловлар** ўрнатилсин:

а) жамоат тартибини, ўта муҳим ва тоифаланган объектларни ҳамда аҳолининг ҳаёт фаолиятини таъминловчи инфраструктура объектларини муҳофаза қилиш кучайтирилсин;

б) Қорақалпоғистон Республикасида ҳаракатланиш эркинлиги, шу жумладан, транспорт воситалари учун чеклансин;

в) жисмоний шахсларнинг шахсини тасдиқловчи ҳужжатлар текширилиши, уларнинг шахсий кўриқдан ўтказилиши, улардаги ашёлар ва транспорт воситалари кўздан кечирилиши таъминлансин;

г) Қорақалпоғистон Республикасига кириш ҳамда ундан чиқиш чеклансин;

д) тинч йиғилишлар, кўнгилочар, спорт ва бошқа оммавий тадбирлар ташкил этилиши ва ўтказилиши тақиқлансин;

е) юридик шахслар фаолиятини тўхтатиб туриш ёки тугатишга қаратилган иш ташлашлар ва бошқа ҳар қан-

дай ҳаракатлар тақиқлансин; ж) курул, ўқ-дорилар, портловчи моддалар, махсус воситалар, захарли моддалар сотилиши тақиқлансин, шунингдек, дори ва гиёҳвандлик воситалари, психотроп моддалар, прекурсорлар ҳамда этил спирти ва алкоголь маҳсулотлари муомаласининг алоҳида тартиби жорий этилсин;

з) жисмоний шахслардан курул ва ўқ-дорилар, захарли моддалар, юридик шахслардан эса курул, ўқ-дорилар ва захарли моддалар билан бир қаторда ҳарбий ва ўқув-ҳарбий техника, портловчи ва радиоактив моддаларнинг вақтинчалик олиб қўйилиши таъминлансин.

5. Фавқулодда ҳолат режими шароитида қўлланиладиган чора-тадбирларнинг амалга оширилиши учун масъул этиб Қорақалпоғистон Республикаси ҳудуди комендатураси, Ўзбекистон Республикаси Ички ишлар вазирлиги, Ўзбекистон Республикаси Миллий гвардияси, Ўзбекистон Республикаси Давлат хавфсизлик хизмати, Ўзбекистон Республикаси Фавқулодда вазиятлар вазирлиги, шунингдек, Фавқулодда вазиятларнинг олдини олиш ва ҳаракат қилиш давлат тизимида

Давоми 2-бетда →

Ўзбекистон Республикаси Президентининг
ҚАРОРИ

ҚУРБОН ҲАЙИТИНИ НИШОНЛАШ ТЎҒРИСИДА

Халқимизнинг қадимий ва бетакрор байрамларидан бири бўлган муборак Қурбон ҳайитининг мазмун-моҳиятида муҳим бўлган инсонпарварлик, эзгулик, шукроналик ва меҳр-оқибат сингари анъана ва қадриятларни асраб-авайлаш ҳамда кенг тарғиб этиш, ушбу улғу байрамни мамлакатимизда муносиб нишонлаш мақсадида:

1. Жорий йилда Қурбон ҳайитининг биринчи куни **9 июль** – **шанба** кунига тўғри келиши тўғрисида Ўзбекистон мусулмонлари идораси Уламолар кенгаши томонидан қабул қилинган қарорни инобатга олиб, мамлакатимизда 2022 йил **9 июль** куни Қурбон ҳайити байрами сифатида кенг нишонлансин.

Ўзбекистон Республикаси Президентининг 2021 йил 20 декабрдаги “2022 йилда расмий саналарни нишонлаш даврида қўшимча ишланмайдиган кунларни белгилаш ва дам олиш кунларини кўчириш тўғрисида”ги ПФ-35-сон Фармони билан 2022 йил **11-12 июль кунлари дам олиш кунлари** сифатида белги-ланганлиги маълумот учун қабул қилинсин.

2. Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари Дин ишлари бўйича қўмита, Маҳалла ва нурунийларни қўллаб-қувватлаш вазирлиги ҳамда жамоат ташкилотлари билан ҳамкорликда Қурбон ҳайити халқимизнинг миллий ва диний анъаналарига мос равишда ўтказилиши учун тегишли чора-тадбирларни амалга оширсин.

3. Туризм ва маданий мерос вазирлиги Транспорт вазирлиги билан биргаликда юртдошларимиз учун Қурбон ҳайити кунларида мўътабар ёдгорлик ва қадамжоларга зиёратларни ташкил этиш мақсадида қулай шароит ва имкониятлар яратсин.

4. Ўзбекистон Миллий телерадиокомпанияси, Ўзбекистон Миллий ахборот агентлиги ва бошқа оммавий ахборот воситаларига Қурбон ҳайитини нишонлаш билан боғлиқ тадбирларни кенг ёритиш тавсия этилсин.

5. Ўзбекистон Республикаси Президентининг айрим қарорлари иловага мувофиқ ўз кучини йўқотган деб ҳисоблансин.

6. Мазкур қарорнинг ижросини назорат қилиш Ўзбекистон Республикасининг Бош вазири А.Н. Арипов ва Ўзбекистон Республикаси Президентининг маслаҳатчиси М.М. Камиллов зиммасига юклансин.

Ўзбекистон Республикаси

Президенти

Ш.МИРЗИЁЕВ

Тошкент шаҳри,
2022 йил 1 июль

ЎЗБЕКИСТОН РЕСПУБЛИКАСИ ПРЕЗИДЕНТИ ШАВКАТ МИРЗИЁЕВНИНГ МУРОЖААТИ

Қадри ватандошлар!
Хурматли Жўқорги Кенгес депутатлари!

Бугун мен Ватанимизнинг тақдири ва келажагига, қутлуғ заминимиздаги тинчлик ва барқарорликка бефарқ бўлмаган барча инсонларга мурожаат қилмоқчиман.

Қорақалпоғистон Республикасида содир этилган ташвишли воқеаларни ҳар биримиз, барча Ўзбекистон фуқаролари юрагимизда чуқур дард ва изтироб билан қабул қилмоқдамиз.

Маълумки, шу кунларда мамлакатимизда муҳим сиёсий жараён – Ўзбекистон Республикаси Конституциясига ўзгартиш ва қўшимчалар киритиш бўй-

ича умумхалқ муҳокамаси давом этмоқда.

Конституциявий ислохотлар мамлакатимизни ижтимоий-сиёсий ва иқтисодий жиҳатдан янада ривожлантириш, фуқароларнинг ҳуқуқ ва эркинликларини мустаҳкамлаш, “инсон кадри учун” деган эзгу ғояни амалда қарор топтиришга қаратилгандир.

Фуқароларнинг ўз фикри ва хоҳиш-иродасини демократик принциплар ва ҳуқуқий нормалар асосида эркин билдириш бўйича яратилган шарт-шароитларга қарамадан, айрим ғаразли кучлар конституциявий ислохотларга норозилик баҳонасида тажовузкорлик ва зўравон-

лик йўлини танлаб, Ўзбекистондаги вазиятни беқарор этиш ва издан чиқаришга уринмоқда.

Сохта ахборотларни тарқатишнинг синалган технологияларидан, ижтимоий тармоқлар имкониятидан фойдаланган ҳолда, бузғунчи кучлар аниқ мақсадни кўзлаб, фуқароларни Конституцияга хилоф хатти-ҳаракатларга жалб этмоқда.

Уларнинг асосий нияти жамиятни пароканда қилиш, давлатимиз томонидан олиб борилаётган бунёдкорлик сиёсатида бўлган ишончнинг суяйтириш, Ўзбекистоннинг ҳудудий яхлитлигига путур етказишдан иборат.

Илгари хабар қилинганидек, бир гуруҳ шахслар 2022 йил 1

июль куни Нукус шаҳрида сохта шиорларни ўзига никоб қилиб олган ҳолда, фуқароларнинг ишончига кириб, уларнинг фикрини чалғитиб, ҳокимият вакиллари қонуний талабларига бўйсунмасдан, тартибсизликлар келтириб чиқарди, маҳаллий давлат ҳокимияти органлари биноларини эгаллаб олишга уринди.

Улар 2022 йил 2 июль куни жамоат тартибини бузишга қаратилган ҳаракатларни тўхтатиш ҳақидаги талабларга қулоқ солмасдан, республиканинг маъмурий марказидаги асосий кўчаларда бузғунчилик ишларини давом эттирди.

Бундан ташқари, тартибсиз-

ликларда қатнашган айрим кимсалар ҳуқуқ-тартибот органлари ходимлари билан тўқнашувларни келтириб чиқаришга, кўриқланадиган ҳудудларга зўравонлик билан бостириб киришга уринди, биноларга тош ва турли буюмларни отишди.

Шаҳар бўйлаб юриш давомида улар инфратузилма объектларига сезиларли даражада зарар етказишди. Биноларнинг ойналарини синдириб, ёнгинлар содир этишди. Бир нечта гуруҳлар курул-яроғларни қўлга киритиш мақсадида Нукус шаҳар Ички ишлар бош бошқармаси ва Миллий гвардия бошқармаси биноларини эгаллашга уринишди.

Давоми 2-бетда →

ЭЪТИРОФ

КАСБГА САДОҚАТ МАРТАБАНИ БЕЗАЙДИ

Тиббиётнинг ўзи мураккаб соҳа. Ундаги йўналишлар эса ундан-да мураккаб! Зеро, оналик ва болаликни муҳофаза қилиш тизимнинг устувор вазифасидир.



Шундай экан, она ва бола ибораси шу қадар қалбимизга сингиб кетган-ки, мазкур йўналишда фаолият олиб бораётган тиббиёт ходимлари меҳнатига қанчалар таҳсин айтсак-да камлик қилаверади. Айниса, чақалокнинг дунёга келишида, яъни икки жоннинг

ҳаётини сақлаб қолишда акушер-гинекологларнинг меҳнатлари бекиёсдир. Қуни кеча фидойи тиббиёт ходимларининг саъй-ҳаракатлари туфайли она соғ-саломат ўз дилбандини бағрига олди. **Воқеа қуйдагича бўлган:** Поликлиника шифокори автомобилда шоши-

линч туғрукни амалга оширди. Қибрай туманининг Чинобод кўчасидан автомашинага чиққан ҳомиладор аёлда кутилмаганда тўлғоқ бошланади. Унга ҳамроҳ бўлган қайнонаси узокдан тиббиёт муассасаси биносига кўзи тушиб, такси ҳайдовчисига ўша ерга олиб боришини айтади. Пойтахтимиздаги Улуғбек шаҳарчаси 1-сон поликлиникаси ҳудудига “Матиз” русумли автомашинада олиб келинган ҳомиладор аёлга зудлик билан тиббий ёрдам кўрсатишга киришилди. Бу вазиятда ҳар бир сония ҳисобли эди. Туғрук жараёни эса аллақачон бошланган. Шошилиш зарур! Аслида оилавий поликлиника гўдакни дунёга келтириш учун мўлжалланмаган бўлса-да, аёлни шундоққина рўпарадаги ушбу муассаса биносига олиб ўтишга ҳам фурсат етмади. Поликлиника мудараси Ҳилола Жамилова ўта тезкорлик билан бутун масъулиятни зиммасига олиб, автомобилнинг ўзида аёлга доя-



лик қилишга киришди. Мутахассислиги акушер-гинеколог бўлган мудира ва унинг жамоаси саъй-ҳаракати ва қатъияти сабабли туғрук муваффақиятли амалга оширилди. Шундан сўнг она ва бола соғлом ҳолда поликлиникага яқин ҳисобланган Қибрай тумани тиббиёт бирлашмаси тасарруфидаги туғрук комплексига мутахассис ҳамроҳлигида олиб борилган. Ҳозир она-боланинг аҳволи яхши, улар сало-

матлиги туғрук комплекси шифокорлари назорати остида. Туғрук жараёни кутилмаганда бошланган ҳомиладор аёлга автомашинада доялик қилган поликлиника мудараси Ҳилола Жамилова Соғлиқни сақлаш вазирлиги томонидан тақдирланди. Шифокорга вазир ўринбосари Эльмира Баситханова томонидан Соғлиқни сақлаш вазирлиги Бехзод Мусаевнинг ташаккурномаси ва эсдалик совғалари топширилди.

“ЎЗБЕКИСТОН ТИББИЁТИ – ИНСОН ҚАДРИ УЧУН”

НАВОИЙ ВИЛОЯТИ

БЕМОРЛАР ДАВЛАТ ҲИСОБИДАН ОПЕРАЦИЯ ҚИЛИНМОҚДА

Навоий — ҳудуди жиҳатидан мамлакатимизнинг энг йирик вилояти. Бироқ бу ерда яшовчи аҳоли сони нисбатан кам. Шу боис, истиқомат манзиллари анча тарқоқ жойлашган.

Бу эса одамларни сифатли тиббий хизмат билан қамраб олишда қатор қийинчиликларни туғдириши табиий. Демак, тиббиётни аҳолига яқинлаштириш – Навоий вилояти шароитида ўта муҳим эҳтиёж. Давлатимиз эса бугун малакали тиббий ёрдам нафақат олис ва чекка қишлоқлар, балки ҳар бир хонадонга кириб бориши учун барча зарур чораларни кўрмоқда.

Соғлиқни сақлаш вазирлиги томонидан уч ойдири, ҳудудларда ўтказилаётган соғломлаштириш акциялари айна шу эзгу мақсад рўёбига хизмат қилляпти. Қашқадарё, Наманган, Сурхондарё, Фарғона, Бухоро, Тошкент ва Хоразм вилоятларидан сўнг вазирлик марказий аппарати жамоаси, ихтисослаштирилган марказлар мутахассислари ва тиббиёт олий ўқув юр-

лари профессор-шифокорлари – 150 нафардан ортик етакчи мутахассислардан иборат тиббиёт карвони Навоийда бўлди. Таҳлилларга кўра, айна пайтда ҳудуд аҳолисининг 18,1 фоизи сурункали касалликлар билан диспансер назоратида туради. Бу кўрсаткич 2021 йилда 19 фоиз, 2020 йилдаги 19,3 фоизни



мида бундай муаммоларни тизимли ва манзилли ҳал этиш учун маҳаллий аҳолини чуқурлаштирилган тиббий кўрикдан ўтказиш, уларда аниқланган касалликлар бўйича ҳудудлар кесимида беморлар рўйхатини шакллантириш мақсад қилинган. Навбатдаги босқичда ҳасталикка чалинганлар оғирлик даражаси бўйича таснифланиб, юқори технологик амалиётларга муҳтож тоифа Давлат тиббий суғуртаси жамғармаси маблағлари ҳисобидан операцияга тавсия этилди. Эътиборлиси, бундай мураккаб жаррохлик амалиётларининг аксарияти Тошкентдан келган етакчи шифокорлар иштирокида, ви-

лоятнинг ўзида ўтказилаётгани беморлар узоғини яқин, мушқулани осон қилмоқда. Хусусан, Навоий вилояти кўп тармоқли тиббиёт маркази ҳамда Республика шошилич тиббий ёрдам илмий марказининг Навоий филиалида бир куннинг ўзида 10 нафарга яқин кишида шундай юқори технологик жаррохлик амалиётлари бажарилди.

Кам инвазив усулда амалга оширилган ва санокли дақиқалар ичида беморларни узок йиллик дардидан халос этган бу каби илғор операцияларга Республика шошилич тиббий ёрдам илмий марказидан ташриф буюрган етакчи шифокорлар бошчилик қилди.

“Тиббий гуруҳ томонидан жойларда “хонадонбай” “маҳаллабай” тамойили асосида ўрганишлар олиб борилиб, мустақил юришга қийналаган, тўшакка михланиб қолган оғир беморларга малакали тиббий ёрдам ҳам кўрсатилди.

Давоми 4-бетда →



“ЎЗБЕКИСТОН ТИББИЁТИ – ИНСОН ҚАДРИ УЧУН”

НАВОИЙ ВИЛОЯТИ

БИР МУҲТОЖ ҚАЛБИГА ЙЎЛ ТОПМОҚ КАЪБАГА БОРГАННИНГ САВОБИДАН ҲАМ МИНГ ҚАРРА КЎПРОҚДИР

Оғир хасталик туфайли тузалишдан умиди тораб-бора узилиб бораётган беморларнинг кўзларига боққанмисиз? Уларнинг вужудини тилка-пора қилаётган дард — фақат оғриқларгина эмас, балки умидсизлик ҳамдир!

Аммо замонавий тиббиётга инновацион даво усуллари, илғор ёндашувлар татбиқ этилаётган бир пайтда ҳамisha нажот бор! Бундай оғир ахволдаги беморларга қайта ҳаёт бағишлаш учун давлатимиз бор куч ва имкониятини ишга солмоқда. Соғлиқни сақлаш вазири Бехзод Мусаев бошчилигида жойларда ўтказилаётган сайёр тиббий қабулларда, биринчи навбатда, чекка ва олис маҳалларда яшовчи эҳтиёжманд беморларнинг саломатлигини тиклаш чоралари кўриляпти. Пойтахтдан келган етакчи шифокорлар Навоий вилоятида бўлишди. Навоий шаҳридан Томди тумани марказига бўлган масофа – қарийиб 300 километр. Бундан ҳам олис овулларда яшаётганлар бор. Туман ҳудуди катта бўлса-да, аҳолиси сони жуда кам — 16 минг нафарга яқин. Яъни яшаш манзиллари ўта тарқоқ жойлашган. Бу эса малакали тиббий хизматни одамларга янада яқинлаштиришни талаб этади. Вазир бошчилигидаги шифокорлар гуруҳининг ушбу манзилга келиб, Томди тумани ва Зарафшон шаҳрида яшовчи аҳоли учун сайёр тиббий қабул ташкил этгани бежиз эмас. Чунки ҳудудда оғир касалликка чалинган, бироқ юқори технологик операциялар учун нафақат пойтахт, балки вилоят марказига бориб даволанишга имкон топа олмаётганлар бор.

тайди. Аммо қизалоғини марказдаги энг яхши шифохоналарга олиб бориб даволатиш учун отанинг моддий имконияти чекланган.

Сайёр тиббий қабулда бу эҳтиёжманд оиланинг олти йиллик муаммосига санокли дақиқалар ичида ечим топилди. Фарида пойтахтдаги Болалар миллий тиббиёт марказида операция қилинадиган бўлди.

Зарафшон шаҳридан Умиджон Қахрамонов ҳам — худди шундай қисмат эгаси. Туғилганидан буён юраги хаста. Онаси Маглаб Иноятова 12 ёшли ўғлининг тезроқ соғайишини истади. Сайёр тиббий қабулда унда ҳам давлат ҳисобидан мураккаб жарроҳлик амалиёти ўтказилиши белгиланди.

Рисай Ибраева олти ёшли фарзандининг хасталиги



Шулардан бири — жажжи бемор, олти ёшли Фарида Ерланова. У юрак туғма нуқсони билан дунёга келган. Шу боис отаси Ерлан Мантаев сайёр тиббий қабулга нажот истаб келган. Жигарбандининг оғир дарддан халос бўлиб, тенгдошлари қатори соғлом ва бахтиёр бўлиб вояга етишини ис-

учун шу ерда. Боласи бронхиал астма касаллиги билан оғрийди. Йилига икки марта муолажалар олиши зарур. Онахоннинг дардини эшитган мутасаддилар бу эҳтиёжманжд оилага ҳам амалий ёрдам кўрсатиш чораларини кўрди.

Ўтгиз олти ёшли Жаннат Сейдалиева болалигидан юришга қийналади. Икки то-

монлама диспластик коксартроз. Ўтган йил чап чанок-сон бўғимига эндопротез қўйилган. Энди ўнг оёғида ҳам шундай юқори технологик операция ўтказилиши зарур. Сайёр тиббий қабулда Жаннатхонга Республика ихтисослаштирилган травматология ва ортопедия илмий-амалий тиббиёт марказида бепул операция учун йўлланма берилди.

Томди туманининг Шарқ массивида яшовчи Сайёра Эрназарова — 55 ёшда. Ўн беш йилдан бери оёқлари



манлари ҳамда Навоий шаҳридан жами икки минг нафардан зиёд беморлар келди. Тор соҳа мутахассисларининг аксарияти – тиббиёт олимлари, юртимизнинг номдор шифокорлари. Уларга маҳаллий мутахассислар ҳамроҳ бўлди. Республика ихтисослаштирилган тиббиёт муассасалари ва марказий шифо масканлари вакиллари учун алоҳида қабул бўлимлари ажратилган. Бу ерда кун давомида мураккаб жарроҳлик амалиётлари талаб этиладиган, бироқ даволанишга имкони йўқ бир гуруҳ аҳоли вакилларида давлат ҳисобидан даволаниш учун йўлланмалар расмийлаштирилди. Сайёр қабулга саломатлигини тиклаш билан боғлиқ муаммоли масалалар билан келган ҳеч бир бемор умидсиз қайтмади. Мурожатларнинг катта қисмига жойида амалий ечим топилган бўлса, қолганлари тизим раҳбарлари томонидан қатъий назоратга олинди, қисқа муддатда ижобий ҳал этиладиган бўлди.

Навоий шаҳрилик Шокир Назаров бу ерга ёрдам сўраб келган. Ёши — эллик тўққизда. Уч йил аввал инфарктни бошдан ўтказган. Ўшандан бери саломатлигида муаммо бор. Юрак соҳасидаги оғриқлар ва юқори қон босимидан азият чекади. Мутахассислар қон томирларида тикинлар ҳосил бўлганини маълум қилгач, даволаниш учун имкон қидириб, сайёр тиббий қабулда ўз муро-



жаати билан иштирок этди. Натижада Шокир ака шу куннинг ўзидаёқ Республика шошилич тиббий ёрдам илмий марказининг Навоий филиалига ётқизилдиган бўлди. Юқори технологик тиббий текширувлар натижаларига кўра, унда бепул мураккаб операция ўтказилиши белгиланди.

Эллик олти ёшли Феруза Турдиеванинг хасталиги эса оёқларида! Онахон Қизилтепа туманининг Пахтабод маҳалласидан. Сайёр тиббий қабулга яқинлари қўмағида, қўлтиктаёқда кириб келди. 2015 йилдан тизза бўғимида емирилиш жараёни бошланган беморнинг аввал ўнг, кейин чап тиззасида кучли оғриқлар пайдо бўлган. Ҳозирга келиб у эндопротезлаш амалиётига муҳтож. Аммо бу мураккаб операция учун Феруза опа катта маблағ топишга имконсизлигини маълум қилди. Қолаверса, чап тиззасида ҳам муолажалар олиб борилиши керак. Пойтахтга бориб даволаниш эса осон эмас. Соғлиқни сақлаш вазирлиги мутасаддилари бемор мурожаатини тинглаб, уни Республика ихтисослаштирилган травматология ва ортопедия илмий-амалий тиббиёт марказида давлат ҳисобидан даволашга қарор қилди.

Мурожаати ижобий ҳал этилган фуқаролардан яна бири — Мавжуда Убайдова — 66 ёшда. Юрак ишемик касаллигига чалинган. Узоқ йилдан бери режали муолажалар олиб келади. Аммо кейинги пайтларда хасталиги зўрайиб, ахvoli ёмонлашмоқда. Пойтахтдан келган етакчи мутахассислар унда зарур текширувлар ўтказиб, Республика шошилич тиббий ёрдам илмий маркази Навоий филиалида юқори технологик амалиёт ўтказиш зарур, деган хулосага келди. Онахон шу куннинг ўзидаёқ шифохонага жойлаштириладиган бўлди. *Сайёр тиббий қабул давомида ҳеч бир мурожаат эътибордан четда қолмади.*

СОГЛОМЛАШТИРИШ АКЦИЯСИ

ХОНАДОН АҲЛИ ШИФОКОРЛАРДАН МАМНУН

Ўрни келса, бир чимдим меҳр ҳам инсон умрини узайтиришга қодир. Давлат миқёсидаги эътибор ва гамхўрлик эса қанчадан-қанча тақдирларни ўзгартириб юбораётганига бугун барчамиз гувоҳимиз.



Хасталиги кун сайин зўрайиб, сурункали оғриқлардан тинка-мадори қуриган, дардидан тезроқ халос бўлиш учун беминнат ёрдамдан умидвор шундай юртдошларимиз борки, уларни фақат дори-дармон, амбулатор муолажалар ва ширин сўз билангина қайта оёққа турғазил мушкул. Яна ҳам аниқроғи, бундай беморлар – катта маблағ, пухта билим ва юксак салоҳият талаб этадиган мураккаб жарроҳлик операциялари, инновацион даволаш усулларига муҳтож. Соғлиқни сақлаш вазирлиги томонидан жойларда ўтказилаётган соғломлаштириш акциялари давомида, биринчи навбатда, ана шундай фуқароларимизнинг саломатлигини тиклаш чоралари кўрилмоқда. Эзгу ташаббуснинг галдаги манзили – Навоий вилоятида ҳам бунинг гувоҳи бўляпмиз. Хусусан, пойтахтдаги етакчи даволаш муассасалари шифо-

келган мутахассислар 360 та қатновга мўлжалланган туман кўп тармоқли марказий поликлиникасида бўлиб, маҳаллий шифокорлар кўмагида аҳоли вакилларини чуқурлаштирилган тиббий кўрикдан ўтказди. Беморларнинг бир гуруҳига шу ернинг ўзида юқори малакали тиббий ёрдам кўрсатилган бўлса, ахволи оғир, му-

яқинлаштириш – соғлиқни сақлаш тизими олдида қўйилган муҳим талаб. Бу нафақат беморларни тезкор ва манзилли даволаш, балки касалликлар профилактикаси учун ҳам жуда муҳим! Президентимизнинг “Бирламчи тиббий-санитария ёрдами аҳолига яқинлаштириш ва тиббий хизматлар самарадорлигини ошириш бўйича қўшимча чора-тадбирлар тўғрисида”ги қароридан бу долзарб масала ечими ҳам ўз аксини топган. Унга кўра, тиббий-санитария ёрдами муассас-



лий тиббиёт маркази директори, профессор Муроджон Ирисметов бошчилигидаги шифокорлар ушбу бемор уйига бориб, уни тиббий текширувдан ўтказгач, вилоятнинг ўзида давлат ҳисобидан операция қилинадиган бўлди.

Тумanning Қоровултепа маҳалласи, Нурунийлар кўчаси, 74-уйда истиқомат қилувчи 64 ёшли Норпўлат Нурмуродов Республика шошилич тиббий ёрдам илмий марказининг етакчи шифокорлари томонидан текширилганида, унга шошилич тиббий ёрдам кўрсатиш зарурлиги маълум бўлди. Гап шундаки, отахон икки марта инфарктни бошдан кечирган, юрак соҳасида кучли оғриқлар кузатилмоқда. Қон босими тез-тез кўтарилиб туради. Тиббий текширувларда беморнинг учта томирида тромб ҳосил бўлгани тасдиқланган. Мутахассислар отахон хонадонидан тиббий кўрикни яқунлаб, уни зудлик билан тез тиббий ёрдам машинасида вилоят шифохонасига олиб кетишди. Энди Нурпўлат акада давлат ҳисобидан юқори технологик операция амалга оширилади.

Гужбоғтепа маҳалласида яшовчи Дилшода Суюнова эса эндигина 36 ёшни қаршилаган. Аммо у ҳаётни ёрқин рангларда кўришдан бебаҳра. Бир кўзига сунъий гавҳар ўрнатилиши лозим. Иккинчи қорачиғида ҳам кўриш қобилияти аста-секин пасайиб борапти.



корлари акция доирасида Навбахор туманига келди. Айтиш жоизки, ҳудуд аҳолиси ўртасида нафас олиш, овқат ҳазм қилиш аъзолари ҳамда юрак-қон томир хасталиклари энг кўп учрайди. Тошкентдан

раккаб операцияларга муҳтож бошқа тоифа инсонларни вилоят, республика тиббиёт муассасаларида давлат ҳисобидан бепул даволаш чоралари кўрилди. Яна бир муҳим масала: тиббий ёрдамни аҳолига

саларидан йироқда жойлашган манзилларда 2022 йил 1 майдан бошлаб маҳалла тиббиёт пунктлари ташкил этилиши белгиланганди. Ушбу ҳужжат ижроси доирасида Навбахор туманида 11 та шундай муассаса фаолияти йўлга қўйилди.

Жумладан, Пахтакор маҳалласи аҳолиси ҳудуддан 5 километр олис масофада жойлашган оилавий шифокор пунктига қатнашга мажбур бўлаётганди. Энди шу ернинг ўзида замонавий маҳалла тиббиёт пункти ташкил этилган. Контейнер шаклидаги бу муассасада бирламчи тиббий ёрдам кўрсатиш учун зарур барча ускуна ва жиҳозлар мавжуд. Керакли дори-дармон ҳамда тиббиёт

жиҳозлари билан таъминланган. Қолаверса, аҳолига кундузги стационар хизматлари ҳам шу ернинг ўзида кўрсатиляпти. Акция доирасида ушбу маҳалла пунктига Япония халқаро ҳамкорлик ташкилоти – ЈСА томонидан яна қатор тиббий воситалар беғараз ёрдам сифатида тақдим этилди. Шунингдек, пойтахтдан келган мутахассислар иштирокидаги чуқурлаштирилган тиббий кўриклар турли хавfli хасталиклар туфайли тўшакка миҳланиб қолган юртдошларимизни ҳам четлаб ўтаётгани йўқ.

Қирқ икки ёшли Фарҳод Нуров – Навбахор тумани, Олтин Замин кўчаси, 44-уйда яшайди. Ўтган йили автоҳалокат оқибатида оёқларидан оғир жароҳат олган. Саккиз ойдирки, юролмайдди, ҳатто ўрnidан қўзғалишга ҳам қийналади. Республика ихтисослаштирилган Травматология ва ортопедия илмий-ама-

Республика ихтисослаштирилган кўз микрохирургияси илмий-амалий тиббиёт маркази мутахассислари унда давлат ҳисобидан пойтахтда мураккаб операция ўтказадиган бўлди. Умуман, соғломлаштириш акцияси давомида Навоий вилоятининг бошқа туманларида ҳам шундай чуқурлаштирилган тиббий кўриклар ҳамда "хонадонбай" ўрганишлар давом эттирилмоқда.

С Давоми. Боши 3-4 бетларда

Давоми 8-бетда

BUGUNNING MAVZUSI

ТУҒМА ЮРАК НУҚСОНИ НИМА?

У нимаси билан хавфли? Болалар туғма юрак нуқсони билан дунёга келишининг асосий сабаблари нимада?

ЖССТ маълумотларига кўра, ҳар йили ҳар юз минг чақалоқдан 6-10 нафари туғма юрак нуқсони билан дунёга келади. Республикада бир йилда 9 мингга яқин болада туғма юрак нуқсони аниқланмоқда. Бу хасталикнинг олдини олиш, эрта аниқлаш ва бемор болаларни дарддан фориғ этиш ҳозирги вақтдаги тиббиёт соҳасидаги энг катта ҳаракатлардан биридир. Юрак нуқсони билан туғилган болалар умрини охиригача кимгадир муҳтождирлар...

Юрак пороклари – юракнинг анатомик тузилишидаги турғун нуқсон бўлиб, унинг хавфли томони нормал қон оқимида халақит беради. Туғма юрак нуқсони, яъни юрак пороги ҳомиланинг дастлабки 3 ойлигида, боланинг юраги ривожланишида маълум бир ташқи ёки ички факторлар сабабли юракнинг морфологик ўзгариши, тузилиши ёки клапан аппарати ёки унинг томирлари бузилиши оқибатида ривожланган анатомик нуқсондир. Туғма юрак нуқсонлари ёки умуман туғма аномалияларнинг ривожланишига, асосан, олти фактор таъсир қилади:

- Ҳомиладор аёллардаги анемия;
- аёлнинг сурункали ёки ўткир инфекцияли касаллиги;
- вирусли касалликлар;
- гармонал фактор;
- нейрозуморал фактор;
- яқин қариндошлар ўртасидаги ниқоҳ.

- хомилдорликнинг илк даврида она организмнинг захарланиши, баъзи касалликлар билан оғриши, ионловчи нурларнинг биологик таъсири, ирсий касалликлар



- стресс омиллар ҳам сабаб бўлади.

Камқонлик, хомилдорликнинг дастлабки уч ойлигида аёлнинг грипга чалиниши ва бунга қарши даволанмаслиги, қолаверса, буйрак ва бошқа аъзолардаги сурункали хасталиклар, онада учрайдиган турли инфекциялар ва вирусли касалликлар ҳомиланинг соғлом ривожланишига имкон бермайди. Натижада болада туғма нуқсонлар пайдо бўлиши мумкин. Бу муаммонинг олдини олиш учун хомилдорликни режалаштиришдан олдин бўлажак ота-она тор доирадаги мутахассислар кўригидан ўтиб, касаллик аниқланса, даволашни лозим. Бунинг энг самарали йўли хомилдор аёлларни скрининг кўригига ўз вақтида жалб этишдир. Бугун мамлакатимизда она-бола скрининг хизмати ривожланиб бораёпти. Қолаверса, туғруқ мажмуаларида ҳар бир чақалоқ чуқур кўриқдан ўтказилади. Болада туғма нуқсон бўлса, шу ернинг ўзида аниқлаш имкони мавжуд. Юрак нуқсонлари туғма ва орттирилган юрак порокларига фарқ қилинади. Туғма юрак пороклари ҳомила юраги ва юрак йирик томирларининг эмбрионал ривожланиши даврида нотўғри шаклланиши натижасида рўй беради. Гўдақлик даврида (1 ёшгача) юрактомир системасининг тўла ривожланмай қолиши (очиқ артериал йўллар ёки овал тешикнинг битмай қолиши) ҳам юрак порокларига киради. Туғма юрак порокларининг кўп учрайдиган турлари: катта ва кичик қон айланиш доиралари ўртасида ҳар хил комбинациядаги анормал йўллар, шунингдек, юракнинг йирик томирлари

(ўпка артерияси ва аорта)да торайган ёки битиб қолган жойлар бўлиши ёки шу томирларнинг нотўғри жойлашуви киради. Артерия ва вена қонининг қай даража аралашиб туришига қараб баъзи туғма юрак пороклари цианоз билан (кўк хилдаги пороклар), баъзилари цианозсиз (оқ хилдаги пороклар) ўтади. Бу қоннинг катта ва кичик қон айланиш доираларини туташтирувчи ноўрин тешиклар орқали қайси томонга оқиб ўтишига (шунт йўналишига), ўпка артериясидаги босимнинг кўтарилиши даражаси ва юрак мускуллари ҳолатига боғлиқдир.

Боланинг жисмонан тўлиқ ривожланмаслиги, рангпарлик ёки кўкариб кетиш, нафас сиқиши, юрак ҳажми ва ҳолатининг ўзгариши, юракда

шовқин эшитилиши ва бошқалар туғма юрак порокларига хос белгилар кузатилади. Орттирилган юрак пороклари ҳаёт даврида юракнинг хасталаниши, аксари ревмокардит, баъзан атеросклероз, септик эндокардит, захм касалликлари оқибатида пайдо бўлади. Орттирилган юрак порокларига: юрак клапанларининг (ёпилиш вақтида) зич беркилмаслиги; бўлмача қоринчалар (ўнг ва чап бўлмача қоринчалар) ўртасидаги тешик ёки асосий томирлар чиқиш жойининг торайиши (стенози) киради ва шу нуқсонларнинг аралаш бўлиши, бир ёки бир неча клапанда барабар етишмовчилик киради. Юракнинг митрал (чап бўлмача билан қоринча ўртасидаги тешик ва икита ва қаликлапан), аортал, митралаортал ва бошқалар пороклари фарқ қилинади. Юрак порокларида клапан нуқсонлари туфайли қон қисман орқага қайтиб тушади ёки торайган тешикдан зўриқиб ўтиши натижасида юракнинг мускул девори қалинлашиб (гипертрофия), кейинчалик қисқариш кучи сусаяди,



бўшлиқлари кенгайди (дилатация). Натижада қон айланиши издан чиқиб – қон айланиши етишмовчилиги содир бўлади. Орттирилган юрак пороклари тез ёки узок вақт давомида аста-секин юзага келади. Пайдо бўлган иллатнинг жойи, тури, даражасига қараб касалликнинг клиник белгилари турлича намоён бўлади. Баъзан у узок вақт ҳеч қандай белгисиз кечиши ҳам мумкин. Хомилдорлик, зотилжам, грип, шунингдек, кучли жисмоний зўриқиш ва бошқалар касаллик белгиларининг кучайиши ва рўйроқ намоён бўлишига олиб келади. Томир уришининг тезлашуви, оёқларда шиш, хансираш каби юрак етишмовчилиги белгилари ва юракда шовқин пайдо бўлиши юрак пороги борлигидан дарак беради. Юрак порокларининг клиник кўриниши

Шунинг учун вақтида аниқлаб, олдини олиш зарур. Даволаш ишларини шу асосда ташкил этиш учун бемор доимо шифокор кузатувида бўлиши лозим.

Дилдора МУХАМЕДОВА,
Республика шошилиш тиббий ёрдам илмий маркази
терапия йўналиши 1-курс клиник ординатори.

порокнинг хусусияти, шунингдек, унга сабабчи асосий касалликнинг кечиши, беморнинг меҳнат ва дам олиш режимига боғлиқ. Вақтида терапевтик ва жарроҳлик усулида даволаш бемор аҳволини енгилаштириб, умрини узайтириш имконини беради. Туғма юрак нуқсонларининг турлари жуда кўплиги учун даволаш ишлари касалликнинг турига қараб белгиланади. Дейлик, очиқ артериал проток – шундай турлардан бири. Бола олти ойлик бўлгунча, организмдаги физиологик ўзгаришлар туфайли бу туғма юрак нуқсон тури кичик ҳажмда бўлса, ўз-ўзидан ёпилиб кетиш имкони бўлади. Агар туғма юрак нуқсонига гумон бўлса, ЭКГ, рентген, эхоКТ, юракка тетеризацияси, аортография, юрактомирграфия, юрак МРТси ўтказилади.

Қисқаси, ҳар бир касалликни даволашнинг ўз стандартлари бор. Агарда ота-она ўз фарзандида туғма юрак нуқсони борлигини гумон қилса, биринчи навбатда педиатрга ёки болалар кардиологига мурожаат қилиши лозим. Кўп ҳолатларда ота-оналар эртага ёки индинга, кейинги йилга борамиз дейишади ва кеч қолишади. Бунда касаллик асоратланган ва жарроҳлик амалиёти ўтказиб бўлмайдиган ҳолатга келиб қолади. Туғма юрак нуқсонини қанча эрта аниқлаб, жарроҳлик амалиёти ўтказилса, боланинг реанимация ҳолатидан чиқиши, ўзини тиклаши осон кечади. Касалликни эрта аниқлаш жуда муҳим. Агар вақт ўтказиб юборилса биринчи навбатда боланинг аҳволи қийинлашади. Иккинчидан, шифокорлар учун ҳам мураккаблик пайдо бўлади.

ЎЗБЕКИСТОН ВА ХИТОЙ

ҲАМКОРЛИК ЎЗ САМАРАСИНИ БЕРАДИ

Янчжоу тиббиёт университети (Yangzhou Medical University) ҳамда Хайан анъанавий Хитой тиббиёти (Hai'an Hospital of Traditional Chinese Medicine) ва Республика ихтисослаштирилган терапия ва тиббий реабилитация илмий-амалий тиббиёт маркази ўртасида халқаро академик ва илмий-амалий ҳамкорлик тўғрисида меморандум имзоланди.



Жорий йилда Ўзбекистон ва Хитой ўртасидаги икки томонлама муносабатлар – мамлакатларимиз ўртасида дипломатик муносабатлар ўрнатилганлигининг 30 йиллиги нишонланади. Бу даврда замонавий давлатла-

раро муносабатлар ҳар томонлама стратегик шериклик даражасига кўтарилди, давлатлар деярли барча соҳаларда ўзаро манфаатли ҳамкорликни йўлга қўйдилар. Икки давлат раҳбарларининг мунтазам учрашув-

лари алоқаларни ривожлантиришда муҳим йўналишни белгилаб берди. Хитой ва Ўзбекистон Шанхай Ҳамкорлик Ташкилоти (ШХТ) ва бошқа кўп томонлама тузилмалар доирасида яқин алоқаларни ўрнатиб, умумий манфаатларни химоя қилиб, бутун дунёда хавфсизлик ва тараққиётга эришишга ижобий ҳисса қўшмоқда. Таъкидлаш жоизки, ШХТга раислик қилишдек шарафли ва ўта масъулиятли миссия 2021-2022 йилларда Ўзбекистон Республикасига топширилган эди. Ўзбекистон ўз раслиги даврида барчанинг эътиборини Ўзбекистон томонидан илгари сурилган ва ШХТ доирасидаги Ўзбекистон-Хитой кўп томонлама ҳамкорлиги кун тартибига жуда ҳам оғир келадиган қатор устувор вазифаларга қаратишни таклиф қилмоқда.

Давлатимиз раҳбари томонидан Ўзбекистонда амалга оширилаётган кенг қўламли ислохотлар ана шундай ўзаро ҳамкорликнинг асосий омилларидандир. Республикаимизда соғлиқни сақлаш тизимида ҳам касалликларнинг олдини олиш,



эрта ташхис қўйиш ва юқори малакали тиббий ёрдам кўрсатишга қаратилган бирламчи тиббий-санитария ёрдамидан бошлаб, аҳолига ихтисослаштирилган ёрдам кўрсатишга бўлган кенг қўламли ислохотлар амалга оширилмоқда. Ихтисослаштирилган марказлар олдида ҳам аниқ вазифалар қўйилган. Республика ихтисослаштирилган терапия ва тиббий реабилитация илмий-амалий тиббиёт маркази ва Янчжоу тиббиёт университети, шунингдек, Хайан анъанавий Хитой тиббиёти шифохонаси ўрта-

сида халқаро академик ва илмий-амалий ҳамкорлик тўғрисида меморандум имзоланганига бағишланган тадбир ҳам Ўзбекистон-Хитой ўртасидаги кўп томонлама ҳамкорликнинг ёрқин намунасидир. Мазкур тадбирда Соғлиқни сақлаш вазирлиги раҳбари Улуғбек Сабиров ва вазирлик мутасаддилари иштирок этишди.

Бундай халқаро ҳамкорлик мамлакатларимиз аҳолиси саломатлигини мустаҳкамлашда ўз самарасини беради.

Ибодат СОАТОВА.

ОБЪЯВЛЕНИЕ

РЕСПУБЛИКА УЗБЕКИСТАН

Финансирование Саудовского фонда развития № 4/588

Проект «Строительство и оснащение современным медицинским оборудованием республиканских специализированных научно-практических медицинских центров»

Закупка медицинского оборудования для республиканских специализированных научно-практических медицинских центров

Запрос коммерческих предложений №UZB-4/588/RfQ/02

Министерством здравоохранения Республики Узбекистана было опубликовано приглашение на подачу коммерческих предложений №UZB-4/588/RfQ/02 в следующих средствах массовой информации:

11 апреля 2022 года на сайте Министерства здравоохранения Республики Узбекистан;

11 апреля 2022 года на сайте Tenderweek.com;

11 апреля 2022 года на сайте ГУП «O'zmedimpeks»;

Настоящим Министерство здравоохранения Республики Узбекистан информирует о результатах проведения вышеуказанных торгов.

РЕЗУЛЬТАТЫ ПРОВЕДЕНИЯ ВЫШЕУКАЗАННЫХ ТОРГОВ

№ Лота	Наименование участника	Страна участника	Общая сумма присужденного контракта
1	Sun Gate International LLC	Узбекистан	94 500,00 долл. США
2	Arash Medical Central Asia LLC	Узбекистан	125 000,00 долл. США
3	Sun Gate International LLC	Австрия	64 500,00 долл. США
4	SIRIN DUNYASI GIDA URUNLERI SANAYI VE TICARET LIMITED SIRKETI	Турция	110 000,00 Евро
5	Norvale Company Gmbh	Германия	99 840,00 Евро
6	Norvale Company Gmbh	Германия	71 940,00 Евро

Объединенная Группа Реализации Проектов
ул. Паркентская, д. 51, г. Ташкент, 100007, Республика Узбекистан, ТашиУВ

Тел. (+998 71) 268-12-13, 268-25-39, Факс (+998 71) 267-73-47

e-mail: sfd.ssmc@gmail.com

THE REPUBLIC OF UZBEKISTAN

SaudiFundforDevelopmentfinancing No. 4/588

Construction and Equipping of Republican Specialized Scientific and Practical Medical Centers with Modern Equipment Project
Procurement of medical equipment for republican specialized scientific and practical medical centers

Request for Quotations No. UZB-4/588/RfQ/02

The Ministry of Health of the Republic of Uzbekistan published request for quotations No. UZB-4/588/RfQ/02 in the following media:

11th April 2022 on the website of the Ministry of Health of the Republic of Uzbekistan;

11th April 2022 on Tenderweek.com;

11th April 2022 on the website of the "O'zmedimpeks" LLC;

The Ministry of Health of the Republic of Uzbekistan hereby informs about the results of the above tender.

RESULTS OF THE ABOVE TENDER

Lot No.	Name of Participant	Country of Participant	Total Price of Contract Awarded
1	Sun Gate International LLC	Uzbekistan	USD 94 500,00
2	Arash Medical Central Asia LLC	Uzbekistan	USD 125 000,00
3	Sun Gate International LLC	Uzbekistan	USD 64 500,00
4	SIRIN DUNYASI GIDA URUNLERI SANAYI VE TICARET LIMITED SIRKETI	Turkey	EUR 110 000,00
5	Norvale Company Gmbh	Germany	EUR 99 840,00
6	Norvale Company Gmbh	Germany	EUR 71 940,00

United Project Management Unit

51, Parkentskayast., Tashkent, 100007, Republic of Uzbekistan, TashIUW

Tel. (+998 71) 268-12-13, 268-25-39, Fax (+998 71) 267-73-47

e-mail: sfd.ssmc@gmail.com

"ЎЗБЕКИСТОН ТИББИЁТИ – ИНСОН ҚАДРИ УЧУН"

НАВОИЙ ВИЛОЯТИ

"БИЗ БАХТЛИ ОДАМЛАР САФИГА ҚАЙТДИК!"

Хасталикнинг ҳар қандай тури — мураккаб синов. Ўз вақтида ва тўғри муолажа қилинмаса, кичик жароҳат ҳам оғир асоратларга сабаб бўлиши мумкин.

❖ **Охири. Боши 3, 4, 5-бетларда**

Аммо дардига дармон топиш учун нажот кутиб яшаётган оғир беморлар борки, давлатимиз, биринчи навбатда, ана шундай юртдошларимиз хузурига бориб, уларга шифо ва меҳр улаштириш мақсад қилган. Бир эмас, юзлаб инсонларнинг яна ҳаётга қайтишига сабаб бўлаётган соғломлаштириш акцияси шуниси билан аҳамиятли. Ушбу хайрли ташаббус доирасида Навоий вилоятида кўплаб беморларда давлат ҳисобидан юқори технологик амалиётлар бажарилапти. Натижада улар узок йиллик дардидан санокли дақиқалар ичида халос бўлмоқда.

Кармана туманида яшовчи 28 ёшли Отабек Тошқулов 2009 йилдан бери буйрак хасталигидан азият чекади. Айни пайтга келиб унинг аҳволи янада оғирлашган. Буйрак етишмовчилиги туфайли ҳафтада икки бор гемодиализ муолажаларини олишга мажбур. Отабекнинг оғир дардан кун сайин сўлиб бораётганини кўриш яқинлари учун чинакам синов, албатта. Шу боис беморнинг опаси, 32 ёшли Наргиза Тошқулова ўз укасига бир буйрагини беришга қарор қилди. Соғломлаштириш акцияси доирасида Навоийга келган академик В. Воҳидов номидаги Республика ихтисослаштирилган хирургия ил-

мий-амалий тиббиёт марказининг юқори малакали мутахассислари унда буйрак трансплантацияси амалиётини бажаришди. Муҳими, операция муваффақиятли якунланди. Ҳозир беморнинг ҳам, донорнинг ҳам аҳволи яхши.

Навоий шаҳрида яшовчи Раъно Сафарова ҳам жигарбандининг соғайиши учун вилоят кўп тармоқли тиббиёт марказига нажот истаб келди. Чунки ўттиз бир ёшли кизи Гулрух Сафарова оғир хаста. 2016 йилда ҳар икки оёғининг чаноқ-сон бўғимида суяк емирилиши жараёни бошланган. Икки ярим йилдан буён эса мустақил юра олмайди. Шифокорлар унга икки томонлама диспластик коксартроз ташҳисини қўйган. Жорий йил бошида беморнинг ўнг

оёғига эндопротез мосламаси ўрнатилган эди. Энди худди шундай юқори технологик операция чап чаноқ-сон бўғимида ҳам ўтказилиши зарур. Аммо амалиёт учун катта маблағ талаб этилади. Соғломлаштириш акцияси доирасида вилоятга келган Республика ихтисослаштирилган травматология ва ортопедия илмий-амалий тиббиёт маркази шифокорлари Гулрухга давлат ҳисобидан эндопротез ўрнатадиган бўлди. Мураккаб операция қарийб 40 дақиқа давом этди. Бемор кўп йиллик хасталигидан



қисқа муддатда фориг бўлди. У тез кунларда ўзи орзу қилганидек, икки ярим ёшли қизалоғини бошқа миллионлаб бахтиёр оналар сингари бемалол опичлаб юра олади. "Биз бахтли одамлар сафига қайтдик!", дейди Гулрух қувонч билан. Акция чуқурлаштирилган тиббий кўрик, бепул операция ва сайёр қабуллар билан чекланиб қолаётгани йўқ. Масалан, пойтахтдан ташриф буюрган бир гуруҳ тиббиёт олимлари,

профессорлар Республика ўрта тиббиёт ва фармацевтика ходимлари малакасини ошириш ва уларни ихтисослаштириш маркази Навоий филиалида билим ва тажрибасини ошираётган ҳамширалар учун маҳорат дарслари ўтди.

Бу қизиқарли жараёнга Японияда шу соҳа бўйича малакали мутахассислар кунчиқар юртдан туриб интернет орқали боғланишди. Олимлар бугунги кунда ўрта тиббиёт ходимлари зиммасига юкланган масъулият ва талаблар ҳақида аниқ мисоллар билан тингловчиларга сўзлаб берди. Айтиш жоизки, мазкур филиал вилоятдаги даволаш-профилактика муассасаларининг 17 мингдан ортиқ ўрта тиббиёт ва фармацевтика ходимлари малакасини ошириш ва уларни касбий қайта тайёрлашга ихтисослашган. Бу ерда

Соғлиқни сақлаш вазирлиги мутасаддилари, республика даражасидаги тиббиёт муассасалари шифокорларидан иборат 150 нафардан зиёд тиббий гуруҳ бошчилигидаги соғломлаштириш тадбирлари самарали кечди. Бу эзгу ташаббус олдинда яна юзлаб, минглаб беморларнинг ҳаётига қайта қувонч бағишлашига шубҳа йўқ.

ҳар йили қарийб 6 минг нафарга яқин мутахассисга сабоқ берилди. Эътиборлиси, марказдаги деярли барча жараён компьютерлаштирилган. Жумладан, тингловчиларнинг ҳужжатларини қабул қилиш тўлиқ электрон тизимга асосланган. Бундан ташқари, 37 та йўналиш бўйича hamshiramalaka.uz платформаси яратилган. Бу эса таълим тизимининг интеграллашуви ва замонавийлашуви ҳамда тингловчилар билимини баҳолаб бориш жараёнининг автоматлашувига хизмат қилмоқда.

– Бугун ўрта тиббиёт ходимлари зиммасида жуда катта масъулият бор, – дейди **филиал директори Вали Тўрақулов.** – Биз тиббиётни янги босқичга кўтариш учун соҳанинг суянчи ва таянчи бўлган ана шу мутахассисларнинг нафақат билим ва малакаси, балки ишга ёндашувини ҳам тўлиқ ўзгартиришга эришишимиз керак.

Шу мақсадда муассасамизда шаффоф тизим яратилган. Малака ошириш ва ихтисослик йўналишлари бўйича яқиний назорат синовлари онлайн тарзда олинмоқда. Акция доирасида тиббиёт олимларининг филиалимизга ташрифи эса тингловчиларимиз учун ўзига хос мотивация бўлди.

Газетанинг 3, 4, 5 ва 8-саҳифаларидаги мақолалар Соғлиқни сақлаш вазирлиги Матбуот хизмати материаллари асосида тайёрланди

Газета
муассиси:
Ўзбекистон
Республикаси
Соғлиқни
сақлаш
вазирлиги

Бош муҳаррир
Амрилло ИНОЯТОВ
Бош муҳаррир ўринбосари
Ибодат СОАТОВА

Газета ўзбек ва рус тилларида чоп этилади. Ҳафтанинг жума кунлари чиқади. Мақолалар кўчириб босилганда «O'zbekistonda sog'liqni saqlash – Здравоохранение Узбекистана» газетасидан олинди, деб кўрсатилиши шарт. Таҳририятга келган қўлёзмалар тақриз қилинмайди ва муаллифга қайтарилмайди.

Манзилимиз: 100060, Ташкент шаҳри, Истикбол кўчаси, 30 уй, 2-қават.
Тел/факс: (71)233-13-22, тел.: (71)233-57-73. Газета 2009 йил 11 мартда Ўзбекистон Республикаси Президенти Администрацияси ҳузуридаги Ахборот ва оммавий коммуникациялар агентлигида 0015-рақами билан рўйхатга олинган.

Газета материаллари таҳририят компьютер марказида терилди ва саҳифаланди.

Адади 712 нусха.
Буюртма Г-740

Газета «ШАРҚ» нашриёт-матбаа акциядорлик компанияси босмахонасида чоп этилди. Корхона манзили: Буюк Турон кўчаси, 41-уй.
Газета ҳажми 2 босма табоқ. Формати А3. Офсет усулида босилган.